

御定全唐詩錄

土岐文庫
文庫17
W65
15



皇清詩錄卷第四册

郎士元

大清乾隆四十四年
郎士元

010185189312

文庫 17
W65
15



御定全唐詩錄卷第四十一

禮部侍郎臣徐倬翰林院侍讀學士臣徐元正奉

旨校刊

郎士元

士元字君胄中山人天寶十五年擢進士第寶應
初選京縣官詔試中書補渭南尉歷右拾遺出為
郢州刺史與錢起齊名

高仲武云士元負外河嶽英奇人倫秀異自家刑
國遂擅大名右丞以後錢郎更長郎公稍更閑雅
近於康樂如荒城背流水遠雁入寒雲又去鳥不
知倦遠帆生暮愁又蕭條夜靜邊風吹獨倚營門

昭和六十年二月一日贈
吉原氏寄

望秋月可齊衡古人掩映時輩又暮蟬不可聽落
葉豈堪聞古人謂謝朓工於發端比之於今有慚
沮矣

古體詩

題劉相公三湘圖

昔歲別衡霍邇來憶南州今朝平津邸兼得瀟湘遊稍
辨郢門樹依然芳杜洲微明三巴峽咫尺萬里流去鳥
不知倦遠帆生暮愁涪陽指天末北渚空悠悠枕上見
漁父坐中常狎鷗誰言魏闕下自有東山幽

塞下曲

寶刀塞下兒身經百戰曾百勝壯心竟未嫖姚知白草

山頭日初沒黃沙戍下悲笳發蕭條夜靜邊風吹獨倚
營門望秋月

近體詩

春宴張舍人宅

懶尋芳草徑來接待臣筵山色知殘雨墻陰覺暮天鶯
啼漢宮柳花隔杜陵烟地與東城接春光醉目前

寄李紆

雨餘溪巷靜獨酌送殘春車馬雖嫌僻鶯花不棄貧蟲
聲粘戶網鼠跡印床塵借問山陽會如今有幾人

送楊中丞和蕃

錦車登隴日邊草正萋萋舊好隨君長新愁聽鼓鼙河

源飛鳥外雪嶺大荒西漢壘今猶在遙知路不迷

送李將軍赴定州

雙旌漢飛將萬里獨橫戈春色臨關盡黃雲出塞多鼓
鼙悲絕漠烽戍隔長河莫斷陰山路天驕已請和

送裴補闕入河南幕

皎然青瑣客何事動行軒苦節酬知己清吟去掖垣秋
城臨海樹寒月上營門鄒魯詩書地應無鼙鼓喧

送洪州李別駕之任

錢起集云
李善琴

南去秋江遠孤舟興自多能將流水引更入洞庭波夏
口帆初上潯陽雁正過知音在霄漢佐郡豈蹉跎

送韓司直路出延陵

一作皇
甫冉詩

遊吳還適越來往任風波復送王孫去其如春草何岸
明殘雪在潮滿夕陽多季子畱遺廟停舟試一過

送元詵還丹陽別業

已知成傲吏復見解朝衣應向丹陽郭秋山獨掩扉草
堂連古寺江日動晴暉一別滄洲遠蘭橈幾歲歸

送奚賈歸吳

東南富春渚曾是謝公遊今日奚生去新安江正秋水
容清過客霜葉伴行舟遙想赤亭下聞猿應夜愁

盤屋縣鄭儀宅送錢大

暮蟬不可聽落葉豈堪聞共是悲秋客那知此路分荒
城背流水遠雁入寒雲陶令門前菊餘花可贈君

宿杜氏江樓

適楚豈無願思歸秋向深故人江樓月永夜千里心落
葉攪鄉夢鳥啼驚越吟寥寥更何有斷續空城砧

馮翊西樓

城上西樓倚暮天樓中歸望正淒然近郭亂山橫古渡
野莊喬木帶新烟北風吹雁聲能苦遠客辭家月再圓
陶令好文常對酒相招一和白雲篇

春宴王補闕城東別業

柳陌乍隨洲勢轉花源忽倚竹陰開能將瀑水清人境
直取流鶯送酒杯山下古松當綺席簷前片雨滴春苔
地主同聲復同舍留歡不畏夕陽催

酬王季友題半日村別業兼呈李明府

村映寒原日已斜煙生密竹早歸鴉長溪南路當羣岫
半景東鄰照數家門通小徑連芳草馬飲春泉踏淺沙
欲待主人林上月還思潘岳縣中花

酬王季友秋夜宿露臺寺見寄

石林精舍武溪東夜扣禪扉謁遠公月在上方諸品靜
心持半偈萬緣空蒼苔古道行應遍落木寒泉聽不窮
更憶雙峯最高頂此心期與故人同

送崔侍御往容州宣慰

秦源獨立望湘川擊隼南飛向楚天奉詔不言空慰俗
清時應得訪遺賢荆門曉色兼梅雨桂水春風過客船

疇昔常聞陸賈說故人今日豈徒然

蓋少府新除江南尉問風俗

聞君作尉向江潭吳越風烟到自諳客路尋常隨竹影
人家大抵傍山嵐綠溪花木偏宜遠避地衣冠盡向南
唯有夜猿啼海樹思鄉望國意難堪

送李敖湖南書記

憐君才與阮家同掌記能資亞相雄入楚豈忘看淚竹
泊舟應自愛江楓誠知客夢烟波裏官厭猿鳴夜雨中
莫信衡湘書不到年年秋雁過巴東

送郴縣裴明府之任兼充宣慰

白蘋楚水三湘遠芳草秦城二月初連雁北飛看欲盡

孤舟南去意何如渡江野老思求莫候館郴人憶下車
別後天涯何所寄故交唯有袖中書

聽鄰家吹笙

鳳吹聲如隔綵霞不知牆外是誰家重門深鎖無尋處
疑有碧桃千樹花

皇甫冉

冉字茂政潤州丹陽人十歲能屬文尤善詩張曲
江溪器之謂清穎秀拔有江徐之風天寶十五載
舉進士第一歷無錫尉左金吾兵曹王縉為河南
元帥表掌書記大曆二年遷左拾遺轉右補闕
獨孤及序云集凡三百五十篇其詩大畧以古之

比興就今之聲律天機獨得非師資所獎每文會
別筵新意秀句輒加於常時一等才鍾於情故也
高仲武云冉詩巧於文字發調新奇遠出情外往
以世道艱虞避地江外每文章一到朝廷作者為
之變色如閉門白日晚倚杖青山暮與衰露收新
稼迎寒葺舊廬及遠山重叠見芳草淺溪生岸草
知春晚沙禽好夜驚又燕知社日辭巢去菊為重
陽冒雨開可以雄視潘張平揖沈謝又巫山詩終
篇奇麗自晉宋齊梁已來採掇者無數而補闕獨
獲驪珠使前賢失步後輩却立自非天假何以迨
斯恨長轡未騁而芳蘭早凋悲夫

古體詩

題裴二十一新園

東郭訪先生西郊尋隱路久為江南客自有雲陽樹已
得閑園心不知公府步閉門白日晚倚杖青山暮果熟
任霜封籬疎從水度窮年常牽綴往事惜淪誤唯見耦
耕人朝朝自來去

近體詩

長安路

長安九城路戚里五侯家結束趨平樂聯翩抵狹斜高
樓臨遠水複道出繁花唯見相如宅蓬門度歲華
巫山高

巫峽見巴東，迢迢出半空。雲藏神女館，雨到楚王宮。朝暮泉聲落，寒暄樹色同。清猿不可聽，偏在九秋中。

秋夜宿嚴維宅

昔聞元度宅，門向會稽峯。君住東湖下，清風繼舊踪。秋深臨水月，夜半隔山鐘。世故多離別，良宵詎可逢。

歸渡洛水

暝色赴春愁，歸人南渡頭。渚煙空翠合，灘月碎光流。澧浦饒芳草，滄浪有釣舟。誰知放歌客，此意正悠悠。

奉和王相公早春登徐州城

落日憑危堞，春風似故鄉。川流通楚塞，山色遶徐方。壁壘依寒草，旌旗動夕陽。元戎資上策，南畝起耕桑。

逢莊納因贈

世故還相見，天涯共向東。春歸江海上，人老別離中。郡吏名何晚，沙鷗道自同。甘泉須早獻，且莫嘆飄蓬。

西陵寄一公朱放

西陵遇風處，自古是通津。終日空江上，雲山若待人。汀洲寒事早，魚鳥興情新。南望山陰路，心中有所親。

送裴負外赴江南

分務江南遠，留歡幕下榮。楓林縈楚塞，水驛到湓城。岸草知春晚，沙禽好夜驚。風帆幾日到，處處暮潮平。

送元晟歸潛山所居

溪山秋事蚤，歸去復何如。裊露收新稼，迎寒葺舊廬。題

詩卽招隱作賦是閒居別後空相憶嵇康懶寄書

送盧山人歸林慮山

無論行遠近歸向舊煙林寥落人家少青冥鳥道深白雲長滿目芳草自知心山色連東海相思何處尋

途中送權三兄驛

淮海風濤起江關幽思長同悲鵲繞樹獨作雁隨陽山晚雲和雪汀寒月映霜由來濯纓處漁父夢滄浪

送朱逸人

時人多不見出入五湖間寄酒全吾道移家愛遠山更看秋草暮欲共白雲還雖在風塵裏陶潛身自閒

送陸潛夫茅山尋友

登山自補屐訪友不齋糧坐憇清楓晚行吟白日長人煙隔水見草氣入林香誰作招尋侶清齋宿紫陽

賦得江路西南永送康判官往新安

一作劉長卿

不向新安去那知江路長猿聲近廬霍水色勝瀟湘驛路收殘雨漁家帶夕陽何須愁旅泊使者有輝光

獨孤中丞筵陪饒送韋使君赴昇州

中司龍節貴上客虎符新地控吳襟帶才高漢摺紳泛舟應度臘入境便行春何處歌來暮長江建業人

酬袁補闕中天寺見寄

東林初結社已有晚鐘聲窓戶皆流水房廊半架城遠山重疊見芳草淺淺生每與君攜手多煩長老迎

重送陸潛夫賦得越山三韻

西陵猶隔水北岸已春山獨鳥連天去孤雲伴客還
祗應結茅宇出入石林間

閑居作

多病辭官罷閑居作賦成圖書唯藥籛飲食止藜羹
學謝淹中術詩無鄴下名不堪趨建禮詎是厭承明
已輟金門步方從石路行遠山期道士高柳覓先生
性懶尤因疾家貧自省營種苗雖尚短穀價幸全輕
篇詠投康樂壺觴就步兵何人肯相訪開戶一逢迎

登玄元廟

古廟川原迥重門禁籞連海童紛翠蓋羽客事瓊筵
御

路分疎柳離宮出苑田興新無向背望久辨山川物外
將遺老區中誓絕緣函關若遠近紫氣獨依然

河南鄭少尹城南亭送鄭判官還河東

使臣懷餞席亞尹有前溪客是仙舟裏途從御苑西
泉聲喧暗竹草色引長堤故絳青山在新田綠樹齊
天秋聞別鵠關曉待鳴鷄應歎沉冥者年年津路迷

送歸中丞使新羅

詔使殊方遠朝儀舊典行浮天無盡處望日計前程
斲喜孤山出長愁積水平野風飄疊鼓海雨濕危旌
異俗知文教通儒有令名還將大戴禮方外授諸生

宿嚴維宅送包七

一作劉長卿

江湖同避地分手自依依盡室今為客經秋空念歸歲
儲無別墅寒服羨鄰機草色村橋晚蟬聲江樹稀夜涼
宜共醉時難惜相違何事隨陽侶汀洲忽背飛

送從弟豫貶遠州

一作劉長卿

何事成遷客思歸不見鄉遊吳經萬里弔屈過三湘水
與荆巫接山通鄢郢長名嗟黃綬繫身是白眉良獨結
南枝恨應思北雁行憂來沽楚酒元髻莫凝霜

秋日東郊作

閒看秋水心無事坐對寒松手自栽廬岳高僧畱偈別
茆山道士寄書來燕知社日辭巢去菊為重陽冒雨開
淺薄將何稱獻納臨岐終日獨徘徊

同溫丹徒登萬歲樓

高樓獨上思依依極浦遙山合翠微江客不堪頻北望
塞鴻何事又南飛丹陽古渡寒煙積瓜步空洲遠樹稀
聞道王師猶轉戰誰能談笑解重圍

送李錄事赴饒州

北人南去雪紛紛鴈叫汀洲不可聞積水長天隨遠客
荒城極浦足寒雲山從建業千峰出江至潯陽九派分
借問督郵纔弱冠府中年少不如君

婕妤好怨

花枝出建章鳳管發昭陽借問承恩者雙蛾幾許長
少室韋鍊師昇仙歌

紅霞紫氣晝氤氳
絳節青幢迎少君
忽從林下昇天去
空使時人禮白雲

送魏十六還蘇州

秋夜深深此送君
陰蟲切切不堪聞
歸舟明日毘陵道
回首姑蘇是白雲

送陸澧郭郎

纔見吳洲百草春
已聞燕雁一聲新
秋風何處催年急
偏逐山行水宿人

會山送別

淒淒遊子若飄蓬
明月清樽祇暫同
南望千山如黛色
愁君客路在其中

皇甫曾

曾字孝常冉之弟也
天寶十二載第進士
歷侍御史坐事徙舒州
司馬陽翟令詩名與兄
相上下時比之張氏景陽
孟陽云

高仲武云昔孟陽之與景陽
詩品遠慙厥弟今侍御較
補闕體制清潔華不勝文
然寒生五湖道春及萬年
枝五言之選也其為士林
所尚宜哉

徐獻忠曰景陽華淨遂掩
哲昆平原英瞻竟難家弟
若皇甫兄弟仕道既同才
名亦配奈何高生猶持不
足之歎觀其律調澄泓聲
文華潔俯視當世殆已飄
然木末矣雖紫霞碧落未
堪凌駕亦何可

少

古體詩

贈霈禪師

南嶽滿湘源吾師經利涉身歸沃州老名與支公接淨
教傳荆吳道緣止漁獵觀空色不染對鏡心自愜室中
人寂寞門外山稠疊天台積幽夢早晚歸負笈

錫杖歌送明楚上人歸佛川

一作權德輿

上人遠自西天至頭陀行遍南朝寺口翻貝葉古字經
手持金策聲泠泠護法護身唯振錫石瀨雲溪淡寂寂
乍來松徑風露寒遙映霜天月成魄後夜空山禪誦時
寥寥掛在枯樹枝真法常傳心不住東西南北隨緣路

佛川此去何時迴應真莫便遊天台

近體詩

秋興

流螢與落葉秋晚共紛紛返照城中盡寒砧雨外聞離
人見衰髻獨鶴慕何羣楚客在千里相思看碧雲

晚至華陰

臘盡促歸心行人至華陰雲霞仙掌出松柏古祠深野
渡冰生岸寒川燒隔林溫泉看漸近宮樹晚沈沈

玉山嶺上作

悠悠驅疋馬征路上連岡晚翠深雲竇寒臺淨石梁秋
花偏似雪楓葉不禁霜愁見前程遠空郊下夕陽

尋陸處士

幾年人不見林下掩柴關留客當清夜逢君話舊山隔
城寒杵急帶月早鴻還南陌雖相近其如隱者閒

和謝舍人雪夜寓直

禁省夜沈沈春風雪滿林滄洲歸客夢青瑣近臣心揮
翰宜鳴玉承恩在賜金建章寒漏起更助掖垣深

題贈雲門邕上人院

春山臨一室獨坐草萋萋身寂心成道花開鳥自啼細
泉松逕裏返景竹林西晚與門人別依依出虎谿

寄劉負外長卿

南憶新安郡千山帶夕陽斷猿知夜久秋草助江長疎

髮應成素青松獨耐霜夢才稱漢主題柱待田郎

送李中丞歸本道

上將宜分閩雙旌復去秦關河三晉路賓從五原人孤
戍雲連海平沙雪度春酬恩看玉劍何處有烟塵

送元侍御充使湖南

雲夢南行盡三湘萬里流山川重分手徒御亦悲秋白
簡勞王事清猿助客愁離羣復多病歲晚憶滄洲

送韋判官赴閩中

孤棹閩中客雙旌海上軍路人從北少嶺水向南分野
鶴傷秋別林猿恐夜聞漢家崇亞相知子遠邀勳

送孔徵士

谷口山多處君歸不可尋家貧青史在身老白雲深掃
雪開松逕疏泉過竹林余生負丘壑相送亦何心

送人往荊州

一作李
嘉祐詩

草色隨驄馬悠悠同出秦水傳雲夢曉山接洞庭春帆
影連三峽猿聲近四隣青門一分手難見杜陵人

送少微上人東南遊

石梁人不到獨往更迢迢乞食山家少尋鐘野寺遙松
門風自掃瀑布雪難消秋夜聞清梵餘音逐海潮

烏程水樓留別

悠悠千里去惜此一樽同客散高樓上帆飛細雨中山
程隨遠水楚思望青楓共說前期易滄波處處通

送林中丞還京

罷戰回龍節朝天上鳳池寒生五湖道春及萬年枝召
化多遺愛胡清已畏知懷恩偏感別隋淚向旌旗

過劉長卿碧澗別業

謝客開山後郊扉去水通江湖十年別衰老一樽同返
照寒川滿平田暮雪空滄洲自有趣不復泣途窮

張芬見訪郊居作

林中雨散早涼生已有迎秋促織聲三徑荒蕪羞對客
十年衰老愧稱兄愁心自惜江籬晚世事方看木槿榮
君若罷官攜手去尋山莫計白雲程

秋夕寄懷契上人

已見槿花朝委露獨悲孤鶴在人羣真僧出世心無事
靜夜名香手自焚窓臨絕澗聞流水客至孤峯掃白雲
更想清晨誦經處獨看松上雪紛紛

早朝日寄所知

長安雪後見歸鴻紫禁朝天舞拜同曙色漸分雙闕下
漏聲遙在百花中爐烟乍起開仙仗玉珮成行引上公
共荷發生同雨露不應黃葉久從風

萼嶺四望

漢家仙仗在咸陽洛水東流出建章野老至今猶望幸
離宮秋樹獨蒼蒼

韓翃

翃字君平南陽人侯希逸鎮淄青翃為從事罷府
閒居十年李勉鎮夷門辟為幕屬時已遲暮不得
意多家居一日夜將半客叩門急賀曰負外除駕
部郎中知制誥翃愕然曰誤矣客曰邸報制誥闕
人中書兩進名不從又請之曰與韓翃時有同姓
名者為江淮刺史又具二人同進御批曰春城無
處不飛花寒食東風御柳斜日暮漢宮傳蠟燭輕
烟散入五侯家又批曰與此韓翃客曰此負外詩
耶翃曰是也是不誤時建中初也終中書舍人
南部新書云昇平公主宅即席李端擅場送王相
之幽鎮翃擅場送劉相巡江淮錢起擅場

紀事云德宗西幸有神智驄如意騶二馬謂之功
臣一日有進瑞鞭者上曰朕有二駿今得此可為
三絕因吟胡觀調馬詩云鴛鴦赭目齒新齊曉日
花間放碧蹄玉勒乍迴初噴沫金鞭欲下不成嘶
又云世傳胡有寵姬柳氏胡成名從辟淄青置之
都下數歲寄詩曰章臺柳顏色青青今在否縱使
長條似舊垂也應攀折他人手柳答曰楊柳枝芳
菲節可恨年年贈離別一葉隨風忽報秋縱使君
來豈堪折後果為蕃將沙叱利所劫胡會入中書
道逢之謂永訣矣是日臨淄大校置酒疑胡不樂
具告之有虞侯將許俊以義烈自許即詐取得之

以授胡希逸聞之曰似我往日所為也俊復能之
古體詩

送李明府赴滑州

渭城寒食罷送客歸遠道烏帽背斜暉青驪踏春草酒
醒孤燭夜衣冷千山早去事沈尚書應憐詞賦好

送客之江寧

春流送客不應賒南入徐州見柳花朱雀橋邊看淮水
烏衣巷裏問王家千閭萬井無多事闔戶開門向山翠
楚雲朝下石頭城江燕雙飛瓦棺寺吳士風流甚可親
相逢嘉賞日應新從來此地誇羊酪自有尊羹味可人
送山陰姚丞攜妓之任兼寄山陰蘇少府

東風香草路南客，心容與白晷。吳王孫青蛾柳家女，都門數騎出河口。片帆舉夜簾，眠橘洲春衫。傷楓嶼山陰，政簡甚從容。到罷唯求物外蹤，落日花邊剡。溪水晴烟竹裏會稽峰，才子風流蘇伯玉。同官曉暮應相逐，加飡共愛鱸魚肥。醒酒仍憐甘蔗熟，知君鍊思本清新。季子如今德有鄰，他日如尋始寧墅。題詩早晚寄西人。

送客還江東

還家不落春風後，數日應沾越人酒。池畔花深鬪鴨欄，橋邊雨洗藏鴉柳。遙憐內舍着新衣，復向隣家醉落暉。把手閒歌香橘下，空山一望鷓鴣飛。

送萬巨

漢相見王陵，揚州事張禹。風帆木蘭楫，水國蓮花府。百頃清江十月天，寒城鼓角曉鐘前。金鑪促膝諸曹吏，玉管繁聲美少年。有如過向長干地，遠對湖光近山翠。好逢南苑看人歸，也向西池留客醉。疎柳垂烟橘帶霜，朝遊石渚暮橫塘。紅牋色奪風流座，白紵詞傾翰墨場。夫子前年入朝後，高名藉藉時賢口。共憐詩興轉清新，遠繼家聲在此身。屈指待為青瑣客，回頭莫羨白亭人。

贈別王侍御赴上都

翩翩馬上郎，執簡佩銀章。西向洛陽歸鄠社，回頭結念蓮花府。朝辭芳草萬歲街，暮宿春山一泉塢。青青樹色傷行衣，乳燕流鶯相間飛。遠過三峯臨八水，幽尋佳賞

偏如此殘花片片細柳風落日疎鐘小槐雨相思掩泣
復何如公子門前人漸疎幸有心期當小暑葛衣紗帽
望回車

近體詩

贈別韋兵曹歸池州

南陵八月天暮色遠峯前楚竹青陽路吳江赤馬船
金諸客貴佩玉主人賢終日應相逐歸期定幾年

寄武陵李少府

小縣春生日公孫吏隱時楚歌催晚醉蠻語入新詩
桂水遙相憶花源暗有期郢門千里外莫怪尺書遲

贈張建

結客平陵下當年倚俠遊
看鞭轡劍醉脫驕驪裘翠
羽雙鬟妾珠簾百尺樓
春風坐相待晚日莫淹留

送故人歸魯

魯客多歸興居人悵別情
雨餘衫袖冷風急馬蹄輕
秋草靈光殿寒雲曲阜城
知君拜親後少婦下機迎

送故人歸蜀

一騎西南遠翩翩入劍門
客衣筒布潤山舍荔枝繁
古廟祠金馬春江帶白黿
自應成旅逸愛客有王孫

酬程延秋夜卽事見贈

長簾迎風早空城澹月華
星河秋一雁砧杵夜千家
節候看應晚心期卧亦賒
向來吟秀句不覺已鳴鴉

送高負外赴淄青使幕

遠水流春色回風送落暉人趨雙節近馬遞百花歸山
驛嘗官酒關城度客衣從來赤管筆提向幕中稀

送元詵還江東

渡江秋色裏詩興與歸心客路隨楓岸人家掃橘林潮
聲當晝起山翠近南溪幾日華陽洞寒花引獨尋

送李秀才歸江南

過淮芳草歇千里又東歸野水吳山出家林越鳥飛荷
香隨去棹梅雨點行衣無數滄江客如君達者稀

題慈恩寺振上人房

披衣聞客至關鎖此時開鳴磬夕陽盡捲簾秋色來名

香連竹徑清梵出花臺身在心無住他方到幾回

送崔過歸淄青幕府

平陵車馬客海上見旌旗舊驛千山下殘花一路時春
衣過水冷暮雨出關遲莫道青州客迢迢在夢思

贈王逖

端笏事龍樓思閒輒告休新調赭白馬暫試黑貂裘珠
履迎佳客金錢與莫愁座中豪貴滿誰道不風流

華亭夜宴庾侍御宅

世故他年別心期此夜同千峰孤燭外片雨一更中酒
客逢山簡詩人得謝公自憐驅匹馬拂曙向關東

送辰州李中丞

白羽逐青絲翩翩南去時
巴人迎道路蠻帥引旌旗
暮雨山開少秋風葉落遲
功成冀他日應見竹郎祠

題蘇許公林亭

平津東閣在別是竹林期
萬葉秋聲裏千家落照時
門隨深巷靜窓過遠鐘遲
客舍苔生處依依又賦詩

送客之上谷

北客悲秋色田園憶去來
披衣朝易水匹馬夕燕臺
風剪荷花碎霜迎栗罇開
賞心知不淺累月故人杯

題薦福寺衡嶽暎師房

春城乞食還高論此中閒
僧臘堦前樹禪心江上山
疎簾看雪卷深戶映花闌
晚送門人出鐘聲杳靄間

送金華王明府

縣舍江雲裏心閒境又偏
家貧陶令酒月俸沈郎錢
黃蘗香山路青楓暮雨天
時間引車騎竹外向銅泉

令狐負外宅宴寄中丞

寒色凝羅幕同人清夜期
玉杯留醉處銀燭送歸時
獨坐隔千里空吟對雪詩

家兄自山南罷歸獻詩叙事

時輩已爭先吾君未着鞭
空嗟鑷鬚日獨是屈腰年
不以殊方遠仍論賞地偏
襄橙隨客路漢竹引歸船
雲外巴東峽林中峴北川
池餘騎馬處宅似卧龍邊
夜簟千峯月朝窗萬井烟
朱荷江女院青稻楚人田
縣舍多瀟

灑城樓入醉眠黃苞柑正熟紅縷鱠仍鮮坐厭牽絲倦
因從解綬旋初辭五斗米唯奉一囊錢室好生虛白書
耽守太元櫃中嘶歎段階下引潺湲落照淵明柳春風
叔夜絃絳紗儒客帳丹訣羽人篇雅論承安石新詩與
惠連興清湖見底襟豁霧開天魏闕心猶繫周才道豈
捐一丘自無逸三府會招賢

奉送王相公赴幽州巡邊

黃閣開帷幄丹墀侍冕旒位高湯左相權總漢諸侯不
改周南化仍分趙北憂雙旌過易水千騎入幽州塞草
連天暮邊聲動地秋無因隨遠道結束佩吳鉤

送李中丞赴商州

五馬渭橋東連嘶逐曉風當年紫髯將他日黑頭公不
異金吾寵兼齊玉帳雄關營春雪下吹角暮山空香麝
松陰裏寒猿黛色中郡齋多賞事好與故人同

送田明府歸終南別業

故園此日多心賞窓下泉流竹外雲近館應逢沈道士
比鄰自識卞田君離宮樹影登山見上苑鐘聲過雪聞
相勸早移丹鳳闕不須常戀白鷗群

送故人赴江陵尋庾牧

主人持節拜荊州走馬應從一路遊斑竹岡連山雨暗
枇杷門向楚天秋佳期笑把齋中酒遠意閒登城上樓
文體此時看又別吾知小庾甚風流

送康洗馬歸滑州

腰佩雕弓漢射聲東歸銜命見雙旌青絲玉勒康侯馬
孟水金堤滑伯城臘雪夜看宜縱飲寒蕪晝獵不妨行
懷君又隔千山遠別後春風百草生

送丹陽劉太真

長干道上落花朝羨爾當年賞事饒下筋已憐鷺炙美
開籠不奈鴨媒嬌春衣晚入青楊巷細馬初過皂莢橋
相訪不辭千里遠西風好借木蘭橈

送客歸江州

東歸復得采真游江水迎君日夜流客舍不離青雀舫
人家舊在白鷗洲風吹山帶遙知雨露溼荷裳已報秋

聞道泉明居止近藍輿相訪為淹留

送鄭負外

風流不減杜陵時五十為郎未是遲孺子亦知名下士
樂人爭唱卷中詩身齊吏部還多醉心顧尚書自有期
要路眼看知已在不應窮巷久低眉

寄徐州鄭使君

江城五馬楚雲邊不羨雍容畫省年才子舊稱何水部
使君還繼謝臨川射堂草遍收殘雨官路人稀對夕天
雖卧郡齋千里隔與君同見月初圓

送襄垣王君歸南陽別墅

都門霽後不飛塵草色淒淒滿路春雙兔坡東千室吏

三鴉水上一歸人愁眠客舍衣香滿走渡河橋馬汗新
少婦北來多遠望應知蟾子上羅巾

送王少府歸杭州

歸舟一路轉青蘋更欲隨潮向富春吳郡陸機稱地主
錢塘蘇小是鄉親葛花滿把能消酒梔子同心好贈人
早晚重過魚浦宿遙憐佳句篋中新

題仙遊觀

仙臺下見五城樓風物淒淒宿雨收山色遙連秦樹晚
砧聲近報漢宮秋疎松影落空壇靜細草香聞小洞幽
何用別尋方外去人間亦自有丹丘

送劉評事赴廣州使幕

征南官屬似君稀才子當今劉孝威蠻府參軍趨傳舍
交州刺史拜行衣前臨瘴海無人過却望衡陽少雁飛
為報蒼梧雲影道明年早送客帆歸

送冷朝陽還上元

青絲紉引木蘭船名遂身歸拜慶年落日澄江烏榜外
秋風疎柳白門前橋通小市家林近山帶平湖野寺連
別後依依寒夢裏共君攜手在東田

送王光輔歸青州兼寄儲侍郎

幾回奏事建章宮聖主偏知漢將功身著紫衣趨闕下
口銜丹詔出關東蟬聲驛路秋山裏草色河橋落照中
遠憶故人滄海別當年好躍五花驄

宴楊駙馬山池

垂楊拂岸草茸茸繡戶簾前花影重
鱗下玉盤金縷細酒開金甕綠醅濃
中朝駙馬何平叔南國詞人陸士龍
落日泛舟同醉處回潭百丈映千峰

送長史李少府入蜀

行行獨出故關遲南望千山無盡期
見舞巴童應暫笑聞歌蜀客又堪悲
孤城晚閉清江上匹馬寒嘶白露時
別後此心君自見山中何事不相思

送端州馮使君

白晳風流似有鬚一門豪貴領蒼梧
三峯亭暗橘邊宿八桂林香節下趨
玉樹群兒爭翠羽金盤少妾揀明珠

懷君樂事不可見駿馬翩翩新虎符

漢宮曲

駿馬繡障泥紅塵撲四蹄歸時何太晚
日照杏花西繡幕珊瑚鈎春開翡翠樓
淡情不肖道嬌倚鈿瑩篋

送客知鄂州

江口千家帶楚雲江花亂點雪紛紛
春風落日誰相見青翰舟中有鄂君

寒食

春城無處不飛花寒食東風御柳斜
日暮漢宮傳蠟燭輕烟散入五侯家

羽林騎

駿馬牽來御柳中鳴鞭欲向渭橋東紅蹄亂踏春城雪
花領驕嘶上苑風

看調馬

鴛鴦赭白齒新齊晚日花中散碧蹄玉勒乍回初噴沫
金鞭欲下不成嘶

宿石邑山中

一作李益

浮雲不共此山齊山靄蒼蒼望轉迷曉月暫飛千樹裏
秋河隔在數峯西

江南曲

長樂花枝雨點銷江城日暮好相邀春樓不閉歲蕤鎖
綠水回通宛轉橋

贈張千牛

蓬萊闕下是天家上路新回白鼻騮急管晝催平樂酒
春衣夜宿杜陵花

贈李翼

王孫別舍擁朱輪不羨空名樂此身門外碧潭春洗馬
樓前紅燭夜迎人

少年行

千點斑斕玉勒驄青絲結尾繡纏髻揮鞭曉出章臺路
葉葉春衣楊柳風

御定全唐詩錄卷第四十一

Blank space for text in the right-hand page.

御定全唐詩錄卷第四十二

禮部侍郎臣徐倬翰林院侍讀學士臣徐元正奉

旨校刊

盧綸

綸字允言河中蒲人天寶避亂客鄆陽大曆初數
舉進士不第元載取其文以進補闕鄉尉累遷監
察御史輒稱疾去坐與王縉善久不調建中初為
昭應令渾瑊鎮河中辟判官累遷檢校戶部郎中
嘗朝京師舅韋渠牟表其才得召見帝有所作輒
使賡和異日問渠牟綸與李益何在答曰綸從渾
瑊在河中驛召之會卒大曆十才子俱工五言詩

綸辭情健麗為尤工

古體詩

送吉中孚校書歸楚州舊山

青袍芸閣郎談笑揖侯王舊籙藏雲穴新詩滿帝鄉名
高閑不得到處人爭識誰知冰雪顏已雜風塵色此去
復如何東臯岐路多藉茅臨紫陌回首憶滄波年來倦
蕭索但說淮南樂並檝湖上游連檣月中泊沿溜入閭
門千燈夜市喧喜逢隣舍伴遙語問鄉園下淮風自急
樹杪分郊邑送客隨岍行離人出帆立漁村遶水田澹
浦隔晴煙欲就林中醉先期石上眠林昏天未曙但向
雲邊去暗入無路山心知有花處登高日轉明下望見

春城洞裏草空長塚邊人自耕寥寥行異境過盡千峰
影雲色凝古壇泉聲落寒井仙成不可期多別自堪悲
為問桃源客何人見亂時

臘日觀咸寧王部曲娑勒擒豹歌

山頭曛曛日將出山下獵圍照初日前林有獸未識名
將軍促騎無人聲潛形踈伏草不動雙鷗轉旋群雅鳴
陰方質子才三十譯語受詞蕃語揖捨鞍解甲疾如風
人忽虎蹲獸人立歛然扼頰批其頤爪牙委地涎淋漓
既蘇復吼拘仍怒果叶英謀生致之拖自深叢目如電
萬夫失容千馬戰傳呼賀拜聲相連殺氣騰陵陰滿川
始知縛虎如縛鼠敗寇降羗生眼前祝爾嘉詞爾無苦

獻爾將隨犀象舞苑中流水禁中山期爾攫搏開天顏
非熊之兆慶無極願紀雄名傳百蠻

宴席賦得姚美人搗箏歌

出簾仍有鈿箏隨見罷翻令恨識遲微收皓腕纏紅袖
深過朱絃低翠眉忽然高張應繁節玉指迴旋若飛雪
鳳簫龍管寂不喧繡幕紗窓儼秋月有時輕弄和郎歌
慢處聲遲情更多已愁紅臉能佯醉又恐朱門難再過
昭陽伴裡最聰明出到人間纔長成遙知禁曲難翻處
猶自君王說小名

栖霞寺隋文帝馬腦盞歌

天宮寶器隋朝物鑲在金函比金骨開函捧之光乃發
阿修羅王掌中月五雲如拳輕復濃昔曾喫酒今藏龍
規形環影相透徹亂雪繁花千萬重可憐貞質無今古
可歎隋陵一坏土宮中艷女滿宮春得親此寶能幾人
一留寒殿殿將壞唯有幽光通隙塵山中老僧眉似雪
忍死相傳保扁鐻

送張侍郎還蜀歌

秦家御史漢家郎親專兩印征殊方功成走馬朝天子
伏檻談邊若流水曉離仙署趨紫微夜接高儒讀青史
瀘南五將望君還願以天書示百蠻曲棧重江初過雨
前旌後騎不同山迎車拜舞多耆老舊卒新營遍青草
塞口雲生火候遲煙中鶴唳軍行早黃花川下水交橫

遠映孤霞蜀國晴
筇竹筍長椒瘴起
荔枝花發杜鵑鳴
回首岷峨半天黑
傳觴接膝何由得
空令豪士仰威名
無復貧交恃顏色
垂楊不動雨紛紛
錦帳胡瓶爭送君
須臾醉起簫笳發
空見雙旌入塞雲

近體詩

皇帝感詞

天衣五鳳彩御馬
六龍文雨露清馳
道風雷翊上軍高
旂花外轉行漏樂
前聞時見金鞭舉
空中指瑞雲

卧病書懷

苦心三十載
白首遇艱難
舊地成孤客
全家賴釣竿
貌衰緣藥盡
起晚為山寒
老病今如此
無人更問看

泊楊子江畔

山映南徐暮
千帆入古津
魚驚出浦火
月照渡江人
清鏡催雙鬢
滄波寄一身
空憐莎草色
長接故園春

題興善寺後池

隔窓棲白鳥
似與鏡湖鄰
月照何年樹
花逢幾度人
岍莎青有路
苔徑綠無塵
永願容居止
僧中老此身

藍溪期蕭道士採藥不至

春風生百草
幾處木苗香
人遠花空落
溪深日復長
病多知藥性
老近憶仙方
青節何由見
三山桂自芳

春日灞亭同苗員外寄庾侍御

坐見春雲暮
無因報所思
川平人去遠
日暖雁飛遲
對

酒山長在看花髻自哀誰堪登灞岍還作異鄉悲

夜中得循州趙司馬侍郎書因寄回使

瘴海寄雙魚中宵達我居兩行燈下淚一紙嶺南書地
說炎蒸極人稱老病餘殷勤報賈傅莫共酒杯疎

赴池州拜覲舅氏留上考功郎中舅

孤賤易蹉跎其如酷似何衰榮同族少生長外家多別
國桑榆在沾衣血淚和應憐失行雁霜霰寄烟波

送韓都護還邊

好勇知名早爭雄上將間戰多春入塞獵慣夜燒山陣
合龍蛇動軍移草木閑今來部曲盡白首過蕭關

送劉判官赴豐州

銜杯吹急管滿眼起風沙大漠山沉雪長城草發花策
行須恥戰寇在莫言家余亦祈勳者如何別左車

送從叔程歸西川幕

千山冰雪晴山靜錦花明群鶴棲蓮府諸戎拜柳營浪
依巴字息風入蜀關清豈念在貧巷竹林鳴鳥聲

送顏推官遊銀夏謁韓大夫

叢叢叫寒笛滿眼塞山青才子樽前畫將軍石上銘獵
聲雲外響戰血雨中腥苦樂從來事因君一涕零

送從姪滁州覲省

愛爾似龍媒翩翩千里迴書從外氏學竹自晉時栽擁
棹逢鷗舞憑闌見雨來上堂多慶樂不醉莫停杯

送從舅成都丞廣歸蜀

褒谷通岷嶺青冥此路深
晚程椒瘴熱野飯荔枝陰
古郡三刀夜春橋萬里心
唯應對楊柳暫醉卓家琴

送李端

故關衰草遍離別自堪悲
路出寒雲外人歸暮雪時
少孤爲客早多難識君遲
掩淚空相向風塵何處期

題崔端公園林

上士愛清輝開門向翠微
抱琴看鶴去枕石待雲歸
野坐苔生席高眠竹掛衣
舊山東望遠惆悵暮花飛

山中詠古木

高林已蕭索夜雨復秋風
墜葉鳴藂竹斜根擁斷蓬
半

侵山影裏長在水聲中
此地何人到雲門去未通

從軍行

二十在邊城軍中得勇名
卷旗收敗馬占磧擁殘兵
覆陣烏鳶起燒山草木明
塞閑思遠獵師老厭分營
雪嶺無人跡冰河足雁聲
李陵甘此沒惆悵漢公卿

晚到盩厔耆老家

老翁曾舊識相引出柴門
苦話別時事因尋溪上村
數年何處客近日幾家存
冒雨看禾黍逢人憶子孫
亂藤穿井口流水到籬根
惆悵不堪住空山月又昏

過李尊師院

城闕望烟霞常悲仙路賒
寧知樵子逕得到葛洪家
犬

伏松間月人行洞裏花留詩千載鶴送客五雲車訪世
山空在觀碁日未斜不知塵俗士誰解種胡麻

和常舍人晚秋集賢院即事十二韻寄贈江南徐

薛二侍郎

綸閣九華前森沉綺仗連洞門開旭日清禁肅秋天霜
滿朝容備鐘餘漏唱傳搖璫陪羽扇端弁入爐煙麟筆
刪金篆龍綃薦玉編汲書荀勗定漢史蔡邕專御竹潛
通筍宮池暗瀉泉亂藂縈弱蕙墜葉灑枯蓮列署齊遊
日重江並謫年登封思議草侍講憶同筵滄海風濤廣
黜山瘴雨偏唯應絨上寶贈遠一呈妍

早春遊樊川野店却寄李端校書崔峒補闕司空

曙主簿耿漳拾遺

白水遍溝塍青山對杜陵晴明人望鶴曠野鹿隨僧古
柳連巢折荒堤帶草崩陰橋全覆雪瀑溜半垂冰鬪鼠
搖松影遊龜落石層韶光偏不待衰敗巧相仍桂樹曾
爭折龍門幾共登琴師阮校尉詩和柳吳興舐筆求書
扇張屏看画蠅卜鄰空遂約問卦獨無徵投足經危路
收才遇直繩守農窮自固行藥病何能掩帙蓬蒿晚臨
川景氣澄颯然成一叟誰更慕騫騰

逢南中使因寄嶺外故人

見說南來處蒼梧接桂林過秋天更暖近海日長陰巴
路綠雲出蠻鄉入洞深信迴人自老夢到月應沉碧水

通春色青山寄遠心炎方難久客莫使髣毛侵

送鮑中丞赴太原

分路引鳴騶喧喧似隴頭暫移西掖望全解北門憂專
幕臨都護分曹制督郵積冰營不下盛雪獵方休白草
連氊帳黃雲擁戍樓今朝送旌旆一減魯儒羞

仲秋望華清宮中樹因以成詠

可憐雲木蓊滿禁碧濛濛色潤靈泉近陰清輦路通玉
壇標八柱金井識雙桐交映凝寒露相和起夜風數枝
盤石上幾葉落雲中燕拂宜秋霽蟬鳴覺晝空翠屏更
隱見珠綴共玲瓏雷雨生成早樵蘇禁令雄野藤高助
綠仙果迥呈紅惆悵繚垣暮茲山聞暗蛩

長安春望

東風吹雨過青山却望千門草色閑家在夢中何日到
春來江上幾人還川原繚繞浮雲外宮闕參差落照間
誰念為儒逢世難獨將衰髣客秦關

晚次鄂州

雲開遠見漢陽城猶是孤帆一日程估客晝眠知浪靜
舟人夜語覺潮生三湘愁鬢逢秋色萬里歸心對月明
舊業已隨征戰盡更堪江上鼓鼙聲

夜投豐德寺謁海上人

夜半中峰有磬聲偶逢樵者問山名上方月曉聞僧語
下界林疎見客行野鶴巢邊松最老毒龍潛處水偏清

願得遠公知姓字焚香洗鉢過浮生

秋中過獨孤郊居

閑園過水到郊居共引家童拾野蔬高樹夕陽連古巷
菊花梨葉滿荒渠秋山近處行過寺夜雨寒時起讀書
帝里諸親別來久豈知王粲愛樵漁

得耿漳司法書因敘長安故友零落兵部苗貲外

發秘書省李校書端相次傾逝潞府崔功曹峒

長林司空丞曙俱謫遠方余以搖落之時對書

增歎因呈河中鄭倉曹暢參軍昆季

鬢似衰蓬心似灰驚悲相集老相催故友九泉留語別
逐臣千里寄書來塵容帶病何堪問淚眼逢秋不喜開

幸接野居宜屣步冀君清夜一申哀

春日卧病示趙季黃

病中饒淚眼常昏聞說花開亦閉門語少漸知琴思苦
卧多唯覺鳥聲喧黃埃滿市圖書賤黑霧連山虎豹尊
今日支離顧形影向君凡在幾重恩

洛陽早春憶吉中孚校書司空曙主簿因寄清江

上人

值迫逢高駐馬頻雪晴閑看洛陽春鶯聲報遠同芳信
柳色邀歡似故人酒貌昔將花共艷鬢毛今與草爭新
年來百事皆無緒唯與湯師結淨因

酬李端野寺病居見寄

野寺鐘昏山正陰
亂藤高竹水聲深
田夫就餉還依草
野雉驚飛不過林
齋沐暫思同靜室
清羸已覺助禪心
寂莫日長相問疾
料君惟取古方尋

訓暢當尋嵩岳麻道士見寄

聞逐樵夫閑看棋
忽逢人世是秦時
開雲種玉嫌山淺
渡海傳書怪鶴遲
陰洞石幢微有字
古壇松樹半無枝
煩君遠寄青囊錄
願得相從一問師

酬趙少尹戲示諸姪元陽等因以見贈

八龍三虎儼成行
瓊樹花開鶴翼張
且請同觀舞鸚鵡
何須竟哂食檳榔
歸時每愛懷朱橘
戲處常聞佩紫囊
謬入院家逢慶樂
竹林因得奉壺觴

同趙進馬元陽春日登長春宮古城望河中因寄

鄭損倉曹

城頭春靄曉濛濛
指望關橋滿袖風
雲騎閑嘶宮柳外
玉人愁立草花中
鐘分寺路山光綠
河繞軍州日氣紅
跡忝方戀賞此時
離恨與君同

早春歸整屋舊居却寄耿拾遺漳李校書端

野日初晴麥隴分
竹園村巷鹿成群
幾家廢井生新草
一樹繁花對古墳
引水忽驚冰滿澗
向田空見石和雲
可憐芳歲青山裏
惟有松枝好寄君

至德中途中書事却寄李儋

亂離無處不傷情
况復看碑對古城
路遠寒山人獨去

月臨秋水雁空驚
顏衰重喜歸鄉國
身賤多慚問姓名
今日主人還共醉
應憐世故一儒生

送李尚書郎君昆季侍從歸觀滑州

鳳雛聯翼美王孫
綵服戎裝擬塞垣
金鼎對筵調野膳
玉鞭齊騎引行軒
冰河一曲旌旗滿
墨詔千封雨露繁
更說務農將罷戰
敢持歌訟慶晨昏

送內弟韋宗仁歸信州觀省

常嗟外族弟兄稀
轉覺心孤是送歸
醉掩壺觴人有泪
夢驚波浪日無輝
烹魚綠岫烟迷草
摘橘青溪露濕衣
聞說江樓長卷幔
幾回風起望胡威

春詞

北苑羅裙帶塵衢
錦繡鞋醉眠芳樹下
半被落花埋

和張僕射塞下曲

林暗草驚風
將軍夜引弓
平明尋白羽
沒在石稜中
月黑鴈飛高
單于夜遁迹
欲將輕騎逐
大雪滿弓刀

天長久詞

臺殿雲涼風日微
君王初賜六宮衣
樓船泛罷歸猶早
行遣才人鬪射飛

古艷詩

自拈裙帶結同心
暖處偏多香氣深
愛捉狂夫問閑事
不知歌舞用黃金

贈別李紛

頭白乘驢懸布囊一迴言別淚千行兒孫滿眼無歸處
唯到樽前似故鄉

題伯夷廟

中條山下黃礪石壘作夷齊廟裏神落葉滿階塵滿座
不知澆酒是何人

過玉貞公主影殿

夕照臨窓起暗塵青松繞殿不知春君看白髮誦經者
半是宮中歌舞人

裴給事宅白牡丹

長安豪貴惜春殘爭翫街西紫牡丹別有玉盤承露冷
無人起就月中看

春日登樓

花正濃時人正愁逢花却欲替花羞年來笑伴皆歸去
今日清明獨上樓

司空曙

曙字文明廣平人能詩為大曆十才子之一登進士第從韋臯於劍南貞元中為水部郎中終虞部徐獻忠曰文明詩氣候清華感賞至到誦之口吻調利情意觸發可謂風人之度矣

古體詩

早春遊望

東風春未足試望秦城曲青草狀寒蕪黃花似秋菊壯

將歡共去老與悲相逐獨作遊社人暮過威輦宿

殘鶯百轉歌同王貞外耿拾遺吉中孚李端遊慈

恩各賦一物

殘鶯一何怨百轉相尋續始辨下將高稍分長復促緡
蠻巧狀語機節終如曲埜客賞應遲幽僧聞詎足禪齋
深樹夏陰清零落空餘三兩聲金谷箏中傳不出山陽
笛裏寫難成憶昨亂啼無遠近晴宮曉色偏相引送暖
初隨柳色來辭芳暗逐花枝盡歌殘鶯歌殘鶯悠然萬
感生謝朓羈懷方一聽何郎閑吟本多情乃知衆鳥非
儔比暮噪朝鳴倦人耳共愛奇音那可親年年出谷待
新春此時斷絕爲君惜明日元蟬催髮白

長林令衛象錫絲結歌

一作李嶠

主人瑀盤盤素絲寒女眷眷墨子悲乃言假使錫爲之
八珍重沓失顏色手援玉筋不敢持始狀芙蓉新出水
仰坼重衣傾萬蕊又如合歡交亂枝紅茸向暮花參差
吳蠶絡繹抽尚絕細縷纖毫看欲滅雪髮羞垂倭隋鬟
繡囊畏並茱萸結我愛此絲巧妙絕世間無爲君作歌
陳座隅

近體詩

公子行

纏臂繡綸巾貂裘窄稱身射禽風助箭驟馬雪飛塵金
埒爭開道香車爲駐輪翩翩不知處應是霍家親

喜外弟盧綸訪宿

靜夜四無隣，荒居舊業貧。
雨中黃葉樹，燈下白頭人。
以我獨沉久，媿君相訪頻。
平生有深意，况是蔡家親。

江園書事寄盧綸

種柳南江邊，閉門三四年。
俗人那勝竹，凡鳥不如蟬。
嗜酒漸思渴，讀書多欲眠。
平生故交在，白首遠相憐。

獨遊寄衛長林

草綠春陽動，遲遲澤畔遊。
戀花同野蝶，愛水劇江鷗。
身外唯須醉，人間盡是愁。
那知鳴玉者，不羨賣瓜侯。

雲陽館與韓紳宿別

故人江海別，幾度隔山川。
乍見翻疑夢，相悲各問年。
孤

燈寒照雨深，竹暗浮煙更有明朝恨，離杯惜共傳。

送郎士元使君赴郢州

使君持節去，雲水滿前程。
楚寺多連竹，江橋遠映城。
登樓向月望，賽廟倚山行。
若動思鄉咏，應貽謝步兵。

送史申之峽州

峽口巴江水，無風浪亦翻。
蕪葭新有雁，雲雨不離猿。
行客思鄉遠，愁人賴酒昏。
檀郎好聯句，莫滯謝家門。

送柳震歸蜀

白日雙流靜，西看蜀國春。
桐花能乳鳥，竹節競祠神。
蹇步徒相望，先鞭不可親。
知從江僕射，登榻更何人。

送曹桐椅

青春三十餘衆藝盡無如中散詩傳畫將軍扇賣書楚
田寒下雁江日暖多魚惆悵空相送歡遊自此疎

送流人

聞說南中事悲君重竄身山村楓子鬼江廟石郎神童
稚留荒宅圖書托故人青門好風景爲爾一沾巾

田家

田家喜雨足鄰老相招攜泉溢溝塍壞麥高桑柘低呼
兒催放犢邀客待烹雞搔首蓬門下如將軒冕齊

望水

高原晴見水楚色靄相和野極空如雪天遙不辨波永
無人迹到獨有鳥行過况在蒼茫外殘陽照更多

新蟬

今朝蟬忽鳴羈客若爲情漸覺一年謝能令萬感生微
風初滿樹落月稍沉城爲問同懷者淒涼聽幾聲

立秋日

律變新秋至蕭條自此初花酣蓮報謝葉在柳呈疎澹
日非雲映清風似雨餘卷簾涼暗度迎扇暑先除草靜
多翻燕波澄乍露魚今朝散騎省作賦興何如

晦日益州北池陪宴

臨泛從公日仙舟翠幕張七橋通碧沼雙樹接花塘玉
燭收寒氣金波隱夕光野聞歌管思水靜綺羅香遊騎
縈林遠飛橈截岍長郊源懷灞澹陂漾寫江潢常侍傳

花詔偏裨問羽觴豈令南峴首千載播餘芳

和耿拾遺元日觀早朝

元日爭朝闕奔流若會溟路塵和薄霧騎火接低星漏
促雙魚鑰車喧百子鈴冕旒當翠殿幢戟滿彤庭表歲
方編瑞乘春即宥刑諸侯陳禹玉司曆獻堯奠壽酒三
觴退簫韶九奏停太陽開物象沛澤及生靈南陌祥光
紫東方曉氣青自憐楊子賤歸草太元經

南原望漢宮

荒原空有漢宮名衰草茫茫雉堞平連雁下時秋水在
行人過盡暮烟生西陵歌吹何年絕南陌登臨此日情
故事悠悠不可問寒禽野水自縱橫

過盧秦卿舊居

五柳茅茨楚國賢桔槔蔬圃水涓涓黃花寒後難逢蝶
紅葉晴來忽有蟬韓康助採君臣藥支遁同看內外篇
為問潛夫空著論何如侍從賦甘泉

余九月中吳山登望是日
天晴暄紅樹中忽聞蟬聲

題暕上人院

閉門不出自焚香擁褐看山歲月長雨後綠苔生石井
秋來黃葉遍繩床身閑何處無真性年老曾言隱故鄉
更說本師同學在幾時攜手見衡陽

酬李端校書見贈

綠槐垂穗乳烏飛忽憶山中獨未歸青鏡流年看髮變

白雲芳草與心違
乍逢酒客春遊慣
久別林僧夜坐稀
昨日聞君到城闕
莫將簪弁勝荷衣

贈衡岳隱禪師

擁褐安居南岳頭
白雲高寺見衡州
石牕湖水搖寒月
楓樹猿聲報夜秋
講席舊逢沙鳥至
梵經初向竺僧求
自知身老將傳法
因下人間逐此遊

酬張芬赦後見贈

紫鳳朝啣五色書
陽春忽報網羅除
已將心變寒灰後
豈料光生腐草餘
建水風烟收客淚
杜陵花竹夢郊居
勞君故有詩人贈
欲報瓊瑤恨不如

長安曉望寄程補闕

迢遞山河擁帝京
參差宮殿接雲平
風吹曉漏經長樂
柳帶晴烟出禁城
天近笙歌臨路發
日高車馬隔塵行
獨有淺才甘未達
多慙名在魯諸生

未得金閨
籍姓名

早夏寄元校書

獨遊野徑送芳菲
高竹林居接翠微
綠坼草深蟲入徧
青藜花盡蝶來稀
珠荷薦果香寒簟
玉柄搖風滿夏衣
蓬葦永無車馬到
更當齋夜憶元暉

閑園即事寄陳公

欲就東林寄一身
尚憐兒女未成人
柴門客去殘陽在
藥圃蟲喧秋雨頻
近水方同梅市隱
曝衣多笑阮家貧

深山蘭若何時到羨與閑雲作四隣

送曲山人衡州

白石先生眉髮光已分紺雪飲紅漿衣巾半染烟霞氣
語笑兼和藥草香茅洞玉聲流暗水衡山碧色映朝陽
千年城郭如相問華表峩峩有夜霜

晚思

蛩吟窓下月草濕堦前露晚景凄我衣秋風入庭樹

金陵懷古

輦路江楓暗宮庭野草春傷心庾開府老作北朝臣

別盧秦卿

知有前期在難分此夜中無將故人酒不及石尤風

別盧綸

御覽詩作曙別綸綸集作綸別曙當以御覽爲正

有月多同賞無秋不共悲如何與君別又是菊黃時

雜興

月沒遼城暗出師雙龍金角曉天悲黃塵滿目隨風散
不認將軍燕尾旗

江村即事

罷釣歸來不繫舡江邨月落正堪眠縱然一夜風吹去
只在蘆花淺水邊

過長林湖西酒家

湖草青青三兩家門前桃杏一般花遷人到處唯求醉
聞說漁翁有酒賒

峽口送友人

峽口花飛欲盡春天涯去住淚沾巾來時萬里同為客
今日翻成送故人

耿漳

漳字洪源河東人登寶應元年進士第官右拾遺
工詩與錢起盧綸諸人齊名號大曆十才子
計敏夫云漳詩有家貧僮僕慢官罷友朋疎世多
傳之又云唐詩人最重行卷雍陶首篇上裴度漳
行卷首篇上第五琦或指為二子邪正雖然方琦
未有釁時上詩亦何足多怪
徐獻忠云漳詩不深琢削而風格自勝蓋生有高

性而寡夙學者也

近體詩

早朝

鐘鼓餘聲裏千官向紫微冒寒人語少乘月燭來稀清
漏聞馳道輕霞映瑣闈猶看嘶馬處未啟掖垣扉

春日即事

數畝東臯宅青春獨屏居家貧僮僕慢官罷友朋疎強
飲沽來酒羞看讀了書閑花更滿地惆悵復何如

廢慶寶寺

一作司空曙

黃葉前朝寺無僧寒殿開池晴龜出曝松暝鶴飛迴古
砌碑橫草陰廊盡雜苔禪宮亦銷歇塵世轉堪哀

贈苗員外

為郎日賦詩小謝少年時業繼儒門後心多道者期
曉迴長樂殿新出永明祠行樂西園莫春風動柳絲

贈嚴維

許詢清論重寂寞住山陰野客投寒寺閑門傍古林海
田秋熟早湖水夜漁深世上窮通理誰能奈此心

贈朗公

來自西天竺持經奉紫微年深梵語變行苦俗流歸月
上安禪久苔生出院稀梁間有馴鴿不去為忘機

贈張將軍

寥落邊城暮重門返照間鼓鼙經雨暗士馬過秋閑慣

守臨邊郡曾營近海山關西舊業在夜夜夢中還

奉送蔣尚書兼御史大夫東都留守

副相威名重春卿禮樂崇錫圭仍拜下分命遂居東高
旆翻秋日清鏡引細風蟬稀金谷樹草徧德陽宮教用
儒門儉兵依武庫雄誰云千載後周召獨為公

上裴行軍中丞

蕭關掃定虎狼群閉閣層城白日曛櫪上驂騮嘶鼓角
門前老將識風雲旌旗四面寒山映絲管千家靜夜聞
更想他時看竹帛功成不獨霍將軍

奉和李觀察登河中白樓

城上高樓飛鳥齊從公一遂躡丹梯黃河曲盡流天外

白日輪傾落海西玉樹九重常在夢雲衢一望杳如迷
何心更和陽春奏况復秋風聞戰鼙

朝下寄韓舍人

侍臣鳴珮出西曹鸞殿分階翊綵旄瑞氣迥浮青玉案
日華遙上赤霜袍花間焰焰雲旗合鳥外亭亭露掌高
肯念萬年芳樹裏隨風一葉在蓬蒿

送友人遊江南

遠別悠悠白髮新江潭何處是通津潮聲偏懼初來客
海味唯甘久住人漠漠煙光前浦晚青青草色定山春
汀洲更有南迴雁亂起聯翩北向秦

拜新月

一作李端詩

開簾見新月便即下階拜細語人不聞北風吹裙帶

秋日

返照入閭巷愁來誰共語古道無人行秋風動禾黍

李端

端趙州人李嘉祐之姪大曆五年進士從駙馬郭

曖遊後移疾江南仕至杭州司馬

古體詩

古別離

水國葉黃時洞庭霜落夜行舟問商賈宿在楓林下此
地送君還茫茫似夢間後期知幾日前路轉多山巫峽
通湘浦迢迢隔雲雨天晴見海檣日落聞津鼓人老自

多愁水深難急流清宵歌一曲白首對汀洲

野亭三韻送錢負外

野菊開欲稀寒泉流漸淺幽人步林後歎此年華晚倚杖送行雲尋思故山遠

留別柳中庸

惆悵流水時蕭條背城路離人出古亭嘶馬入寒樹江南正風波相逢在何處

冬夜與故友聚送吉校書

途窮別則怨何必天涯去共作出門人不見歸鄉路慙執杯酒望望送親故月色入閑軒風聲落高樹雲霄望且遠齒髮行應暮九日泣黃花三秋悲白露君行過

洛陽莫向青山度

歸山招王達

日長原野靜杖策步幽巘雉雒麥苗陰蝶飛溪草晚我生好閑放此去殊未返自是君不來非關故山遠

適谷口元贊善所居

入谷訪君來秋泉已堪涉林間人獨坐月下出相接重露濕蒼苔明燈照黃葉故交一不見素髮何稠疊

近體詩

巫山高和皇甫拾遺

巫山十二峰皆在碧虛中迴合雲藏日霏微雨帶風猿聲寒渡水樹色暮連空愁向高唐望清秋見楚宮

紀事云蜀路有

飛泉亭詩板百餘篇薛能嘗
過此悉去諸板唯留端此篇

春遊樂

柘彈連錢馬銀鈎倭隨鬟摘桑春陌上踏草夕陽間意
合辭先露心誠貌却閒明朝若相憶雲雨出巫山

宴伊東岍

晴洲無遠近一樹一潭春芳草留歸騎朱櫻擲舞人空
花對酒落小翠隔林新竟日皆攜手何由遇此辰

雲際中峰居喜見苗發

自得中峰住深林亦閉關經秋無客到入夜有僧還暗
澗泉聲小荒村樹影閑高窓不可望星月滿空山

晚次巴陵

雪後桺條新巴陵城下人烹魚邀水客載酒奠山神雲
去低斑竹波迴動白蘋不堪逢楚老日暮正江春

宿洞庭

白水連天暮洪波帶日流風高雲夢夕月滿洞庭秋沙
上漁人火煙中賈客舟西園與南浦萬里共悠悠

茂陵山行陪金部韋員外

宿雨朝來歇空山天氣清盤雲雙鶴下隔水一蟬鳴古
道黃花落平蕪赤燒生茂陵雖有病猶得伴君行

聞吉中孚還俗因而有此贈

聞道華陽客儒衣謁紫微舊山連藥賣孤鶴帶雲歸桺
市名猶在桃源夢已稀還家見鷗鳥應媿背船飛

宿華陽洞寄元稱

花洞晚陰陰仙壇隔杏林
漱泉春谷冷擣藥夜窓深
石上開仙酌松間對玉琴
戴家溪北住雪後去相尋

送耿拾遺漳江外括圖書

驅傳草連天回風滿樹蟬
將過夫子宅亦問孝廉船
漢史收三篋周詩採百篇
別君終有淚不是怨流年

送鄭侍御赴洪州

草色隨驄馬悠悠共出秦
水傳雲夢曉山接洞庭春
帆影連三峽猿聲在四隣
青門一分手難見杜陵人

送友人宰湘陰

從宦舟行遠浮湘又入閩
薰葭無朔雁檉栝有蠻神
傳

吏閑調象山精暗訟人唯
須千樹橘暫救李衡貧

送樂平苗明府

本是求彭澤誰云道里賒
山從石壁斷江向弋陽斜
暮色隨楓樹雲陰暗荻花
諸侯舊調鼎應重宰臣家

送王少府遊河南

馬卿方失意東去謁諸侯
過宋人應少遊梁客獨愁
烏翻千室暮蟬急兩河秋
僕本無媒者因君淚亦流

贈郭駙馬

青春都尉最風流二十功
成便拜侯金距鬪雞過上苑
玉鞭騎馬出長楸薰香荀
令偏憐小傅粉何郎不解愁
日暮吹簫楊柳陌路人遙
指鳳凰樓

方塘似鏡草芊芊初月如鉤未上弦
新開金埒看調馬
舊賜銅山許鑄錢
楊柳入樓吹玉笛
芙蓉出水妬花鈿
今朝都尉如相顧
願脫長裾逐少年

舊唐書曰昇平公主賢明有才思大曆中端等十才子遊暖門下每宴集賦詩公主坐視簾中詩之美者賞百緡端先獻警句薰香荀令云云主即以百緡賞之錢起以為宿構請以起姓為韻復云云暖曰此愈工矣起等始服

送周長史

青楓樹裏宣城郡
獨佐諸侯上板橋
江客亦能傳好信
山僧多解說南朝
雲陰出浦看帆小
草色連天見雁遙
別有空園落桃李
知將絲組繫蘭橈

感興

香爐最高頂
中有高人住
日暮下山來
月明上山去

溪行逢雨與柳中庸

日落眾山昏
蕭蕭暮雨繁
那堪兩處宿
共聽一聲猿

聽箏

鳴箏金粟柱
素手玉房前
欲得周郎顧
時時誤拂絃

春晚遊鶴林寺寄使府諸公

野寺尋春花已遲
背巘惟有三枝明
明朝攜酒猶堪醉
為報春風且莫吹

送劉侍郎

幾人同入謝宣城
未及酬恩隔死生
唯有夜猿知客恨
弋陽溪路第三聲



